

Siunnersuummut nassuiaatit**Nassuiaatit nalinginnaasut****1. Aallaqqaasiut**

Nunaoil A/S Danmarkimi aamma Kalaallit Nunaanni pisortat Kalaallit Nunaanni ikummatissiassanik suliaqarnerni peqataanerisa isumagineqarnissaat siunertaralugu 1984-imi pilersinneqarpoq. Namminersorneq pillugu inatsisip akuerineqarneranut atatillugu naalagaaffiup Nunaoil A/S-imi aktiaatini Namminersorlutik Oqartussanut tunniuppai. Tunniussinermut tassunga uiggiullugu Nunaoil A/S pillugu Inatsisartut inatsisaat nr. 15, 7. december 2009-imeersoq Inatsisartut akueraat.

Nunaoil A/S Kalaallit Nunaanni ikummatissiassanut akuersissutini tamaginni aatsitassarsiorluni misissuinerup immikkoortuani akiliunneqarluni suleqataasutut taaneqartartumik peqataavoq. Tamatuma kingunerisaanik Nunaoil A/S ikummatissiassanut akuersissutini ataasiakkaani tamaginni 6,25 %-imiit 12,5 %-imut nikerartumik piginneqataalluni, aatsitassarsiorluni misissuinerup immikkoortuani akiliuteqarani suleqataasutut peqataavoq.

1. januar 2017 tikillugu Kalaallit Nunaanni ikummatissiassanik misissuinissamut qalluinissamullu akuersissutit 16-it tunniunneqarsimapput, taakkunannga akuersissutit affai siunissami qanittumi utertinneqassasut naatsorsuutigineqarluni. Kalaallit Nunaanni ikummatissiassanut akuersissutinut suliat annertussusaat nunarsuarmi niuerfinni ineriartornermut atalluinnarpoq. Kalaallit Nunaanni ikummatissiassanut suliassaqarfimmi suliat ikiliartornerat nunarsuarmi suliat ikiliartornerisa malitsigaat.

Nunarsuarmi niuerfinni ineriartorneq allanngorarpoq. Tamanna Kalaallit Nunaanni killissaliussanut atugassarititaasunut piumasaqaateqarfiuvoq. Ikummatissiassanut suliassaqarfimmi niuerfimmi ineriartorneq ilutigalugu ingerlatseqatigiiffiup suliaannik aamma siulersuisut katitigaanerannik naleqqussaanissamut eqaatsumillu aaqqiisinaanissamut Nunaoil A/S-ip ataatsimeersuarnerani pisassasq siunnersuummi qulakkeerpeqassaaq.

Naalackersuisut ataatsimeersuarnerni Namminersorlutik Oqartussat sinnerlugit piginnittut peqataasarput. Taamaattumik Naalackersuisut oqartussatut suliaqartuusutut siulersuisut amerlassusissaannut katitigaanerannullu piginnittut kissaataannik nalilersuinissamut oqartussaasuupput aalajangiisinaatitaasut.

2. Siunnersuummi immikkoortut pingaarnerit*2.1 Kalaallit Nunaanni avataanilu suliassat isumagineqarnerat*

Siunnersuummi Inatsisartut inatsisaanni siunertanut aalajangersakkanik oqaasertaliinermi iluarsisooqarpoq. ”Kalaallit Nunaanni avataanilu” suliassanik suliarinnittarnermut innersuussineq, atorunnaarsinneqarpoq.

2.2 Ataatsimeersuarnermi siulersuisunik toqqaasarneq

Siunnersuummi siulersuisunut ilaasortat amerlassusaasa ataatsimeersuarnermi naleqqussarsinnaanissaannut eqaatsumillu aaqqiisinnaanermut aqutissiuivoq, siunnersuut akuerineqarpat tamanna atuutinneqalissaaq. Maannakkut Inatsisartut inatsisaat atuuttoq malillugu ukiut marlukkaarlugit siulersuisunut ilaasortat tallimmat qinerneqartartussaapput. Siunnersuut malillugu siulersuisunut ilaasortat tallimmat aamma ukiunut marlunnut piffissaq toqqaaffiusartoo pillugit maleruagassaaq immikkuullarissooq, atorunnaarpoq. Taamaalilluni ataatsimeersuarnermi inunnut tallimanut maleruagassamik immikkuullarissuumik saneqqunneqarsinnaanngitsumik pisussaaffeqartoqarunnaassaaq, kisianni tamatumunnga taarsiullugu aktiaatileqatigiiffinni allani ataatsimeersuarnerit assigalugit, siulersuisunik qinersisarneq pillugu ingerlatseqatigiiffinnut inatsimmut nalinginnaasumik naapertuuttumik ataatsimeersuarnermi siulersuisuni ilaasortanik amerlassusilinnik qinersisooqarsinnaassaaq.

Siunnersuutip suliarineqarnerata nalaani, aktiaatileqatigiiffinni nalinginnaasuni siulersuisunut ilaasortat amerlassusissaat, aktiaatileqatigiiffiit pillugit inatsisip Kalaallit Nunaannut atuutinneqalernera pillugu kunngip peqqussutaani nr. 620, 23. juni 2008-imeersumi maleruagassinneqarpoq. Peqqussummi taanna §49 malillugu aktiaatileqatigiiffimmi siulersuisut ikinnerpaamik inuit pingasuusussaapput.

Tamatuma saniatigut siulersuisunut ilaasortanut piumasaqaatinut tunngatillugu ataatsimeersuarnerit siunnersuummi kiffaanngissuseqarnerutinneqarput. Siulersuisunut ilaasortat ikummatissiassanik misissuinerpiaq qalluinerpiarlu pillugit ilisimasaqassasut pillugu piumasaqaatit Inatsisartut inatsisaanni aalajangersarneqarput. Siunnersuut malillugu siulersuisunut ilaasortat inatsisinut, aningaasaqarnermut inuussutissarsionermullu tunngasut pillugit qaffasissumik sulianut ilisimasaqarnertik uppersarsassagaat pillugu piumasaqaateqarneq atuutiinnassaaq. Taamaattoq siunnersuut malillugu siulersuisut ilisimasaat pissutsinut ikummatissiassanik misissuinermit qalluinernullu immikkuullarissuumik tunngassuteqarnissaat pillugu piumasaqaataajunnaarpoq.

Siulersuisunut ilaasortanut piumasaqaatinik iluarsineq Nunaoil A/S-imi pisortanut piumasaqaatinut sunnuteqarpoq. Inatsisartut inatsisaanni atuuttumi § 5, imm. 1, uniffiup aappaa malillugu pisortap pisortatigoortumik piukkunnassuseqarneri sulianut tunngatillugu qaffasissumik annertussuseqartussaapput minnerpaamillu siulersuisunut qaffasissusiliussatut annertussuseqartussaallutik. Siunnersuummi siulersuisuni nalinginnaasunut ilisimasat annertussusaannut piumasaqaatit allanngortinneqanngillat, taamaattumillu pisortap ilisimasaasa annertussusissaannut piumasaqaatit aamma allanngortinneqaratik.

Taamaattoq siunnersuutip malitsigisaanik, pissutsit ikummatissiassanik misissuinermit qalluinernullu tunngassuteqartut pillugit immikkuullarissunik ilisimasaqarnissaaq pillugu piumasaqaat siulersuisunut ilaasortanut atorunnaarpoq. Piumasaqaat taanna taamaalilluni

siulersuisunut ilaasortanut atuukkunnaarmat aamma pisortamut tunngatillugu piumasaqaat atuukkunnaarpoq.

Inatsisissatut siunnersuut inatsimmut atuuttumut sanilliullugu	
<i>Oqaasertat atuuttut</i>	<i>Inatsisissatut siunnersuut</i>
	§ 1 Nunaoil A/S pillugu Inatsisartut inatsisaanni nr. 15, 7. december 2009-imeersumi makkua allanngortinneqarput:
<p>§ 1. Kalaallit Nunaanni Namminersorlutik Oqartussat ikummatissat pillugit akuersissuteqartarnermi peqataanissaat kiisalu Kalaallit Nunaanni avataanilu tamatumunnga atatillugu pissusissamisoortumik suliassai Nunaoil A/S'i p isumagisarai.</p>	<p>1. § 1 imatut oqaasertalerneqarpoq: ” §1. Nunaoil A/S-ip ikummatissiassanut akuersissutini kiisalu suliassani tamatumunnga pissusissamisoortumik atasuni Namminersorlutik Oqartussat peqataanerat isumagisaraa.”</p>
<p>§ 3. Ingerlatseqatigiiffiup ataatsimeersuarnerani ukiunut marlunnut atuuttussamik siulersuisunut ilaasortassamik tallimanik qinigaaqqissinnaasunik qinersisoqartassaaq, taamaattorli § 4 takuuk.</p> <p><i>Imm. 2.</i> Naalagaaffik, naalagaaffiup Namminersorlutik Oqartussanut tapiissutaasa nul koruuninut annikillisinneqarnissaasa tungaanut, siulersuisunut ilaasortassamik ataatsimik toqqaasinnaavoq. Periarfissaq tamanna naalagaaffiup atorpagu ataatsimeersuarnermi siulersuisunut ilaasortassamik sisamaannarnik qinersisoqassaaq.</p> <p><i>Imm. 3.</i> Ikummatissanik ujarlerneq iluaquteqarniarnerlu eqqarsaatigalugit inatsisitigut, aningaasaqarniarnikkut inuussutissarsiornikkullu pissutsit pillugit qaffasissumik uppersaatitalimmik ilisimasaqarneq siulersuisut katitigaaneranni takuneqarsinnaassaaq.</p>	<p>2. § 3, <i>imm. 1-3</i>, imatut oqaasertalerneqarput: ” Ingerlatseqatigiiffiup ataatsimeersuarnerani, aktiaatileqatigiiffinni siulersuisunik toqqaasarneq pillugu ingerlatseqatigiiffinnut inatsimmut sukulluunniit atuuttumut naapertuuttumik, siulersuisut qinerneqassapput, taamaattoq takuuk § 4.</p> <p><i>Imm. 2.</i> Naalagaaffiup Namminersorlutik Oqartussanut tapiissutai 0 koruuninngorlugit ikilisinneqarnissaasa tungaanut, naalagaaffik siulersuisuni ilaasortassatut inummik ataatsimik toqqaasinnaavoq.</p> <p><i>Imm. 3.</i> Inatsisitigut, aningaasaqarniarnikkut inuussutissarsiornikkullu pissutsit pillugit qaffasissumik uppersaatitalimmik ilisimasaqarneq siulersuisuni ataatsimoortuni takuneqarsinnaassaaq.”</p>
	§ 2 Inatsisartut inatsisaat ulloq 1. juli 2017 atuutilerpoq.

3. Pisortanut aningaasaqarnikkut allaffissornikkullu sunniutaasussat

Siunnersuutip atuutilernerani, siulersuisunut ilaasortanit maannakut tallimaasunit ikinnerusunik toqqaasoqarpat siulersuisunut pisortaaqatigiinnullu aningaasartuutit appartinnissaat ajornarunnaassaaq.

Namminersorlutik Oqartussat Nunaoil A/S-imi siulersuisunut akissaasersuinissamut politikkiat malillugu siulersuisoq 150.000 koruuninik, siulersuisup tullia 75.000 koruuninik aammalu ilaasortat allat nalinginnaasut 50.000 koruuninik ukiumut akissarsiaqartinneqarput. Taamaattumik assersuutigalugu siulersuisuni ilaasortat pingasut toqqarneqarpata siulersuisuniittunut marlunnet Nunaoil A/S ukiumut 100.000 koruuninik sipaartussaavoq. Aammattaaq siulersuisunut pisortaaqatigiinnullu sulianut ilisimasaqarnissamut piumasaqaatinik naleqqusaaanermi pisortaaqatigiinnut aningaasartuutit annertuumik appartissinnaanissaat ajornarunnaarsinneqassaaq.

Taamaattumik pisortanut ataatsimut katillugu aningaasaqarnikkut allaffissornikkullu sunniutaasussat pitsaasuussasut naatsorsuutigineqarpoq, tassami Nunaoil A/S taamaalillunilu Namminersorlutik Oqartussat piginnittutut sipaaruteqarnissamut periarfissaqarnerulertussaammata.

4. Inuussutissarsiortunut aningaasaqarnikkut allaffissornikkullu sunniutaasussat

Siunnersuut inuussutissarsiortunut aningaasaqarnikkut allaffissornikkullu sunniuteqassagatinneqanngilaq.

5. Avatangiisinut, pinngortitamut inuillu peqqissusaannut sunniutaasussat

Siunnersuut avatangiisinut, pinngortitamut aamma inuit peqqissusaannut sunniuteqassagatinneqanngilaq.

6. Innuttaasunut sunniutaasussat

Siunnersuut innuttaasunut sunniuteqassagatinneqanngilaq.

7. Sunniutaasussat allat annertuut

7.1 Naalagaaffeqatigiinnermut aamma namminersorneq pillugu inatsimmut tunngasut

Namminersorneq pillugu inatsisip akuerineqarneranut atatillugu Nunaoil A/S-imi naalagaaffiup aktiaataat Namminersorlutik Oqartussat tiguaat. Namminersorneq pillugu inatsimmut nassuiaatini nalinginnaasuni, immikkoortoq 5.3.5.3-imi allassimavoq, naalagaaffiup tapiissutaasa 0 koruuninngorlugit annikillisinneqarnissaasa tungaanut, naalagaaffik Nunaoil A/S-imi siulersuisunut ilaasortamik ataatsimik toqqaasinnaasoq. Naalagaaffiup Nunaoil A/S-imi siulersuisuni ilaasortamik ataatsimik toqqaanissamut periarfissaqarnera Inatsisartut inatsisaanni § 3, imm. 2-imi maleruagassinneqarpoq.

Naalagaaffiup Nunaoil A/S-imi siulersuisuni ilaasortamik ataatsimik toqqaanissamut periarfissaqarnera siunnersuummi allanngortinneqanngilaq. Taamaattumik naalagaaffeqatigiinnermut imaluunniit namminersorneq pillugu inatsimmut tunngasunut siunnersuut sunniuteqanngilaq.

8. Oqartussaasunut kattuffinnullu il.il. tusarniaaneq

Siunnersuut piffissami 2017-imi februaarip 28-aniit 2017-imi martsip 8-anut Namminersorlutik Oqartussat tusarniaanermut nittartagaanniitinnearpoq kiisalu makkunani tusarniaassutigineqarluni:

Namminersorlutik Oqartussani Naalakkersuisoqarfiit tamarmik, Aatsitassanik Suliassa qarfinnut Avatangiisinut Aqutsisoqarfik, KANUKOKA, Kommuneqarfik Sermersooq, ICC Kalaallit Nunaat, WWF Verdensnaturfonden, Avataq, Tranparency International Greenland, GOIA, Sulisitsisut, NUSUKA, S. I. K., NUNAOIL A/S, Asiaq, Nunatsinni Advokatit, Pinngortitaleriffik, DCE Nationalt Center for Miljø og Energi, GEUS, Kalaallit Nunaanni Rigsombudsmandi kiisalu ikummatissiassanut akuersissutit atuuttut naapertorlugit pisinnaatitsissummik pigisaqartut.

Makkunanngaaniit tusarniaanermut akissuteqaat tiguneqarpoq:

Aningaasaqarnermut Akileraartarnermullu Naalakkersuisoqarfik, Aalisarnermut Piniarnermullu Naalakkersuisoqarfik, Isumaginninnermut, Ilaqutariinnut, Naligiissitaanermut Inatsisinillu Atuutsitsinnermut Naalakkersuisoqarfik, Peqqissutsimut Naalakkersuisoqarfik, Namminiilivinnermut, Pinngortitamut, Avatangiisinut Nunalerinermullu Naalakkersuisoqarfik, Aatsitassanik Suliassa qarfinnut Avatangiisinut Aqutsisoqarfik, KANUKOKA, Kommuneqarfik Sermersooq, Tranparency International Greenland, GOIA, Sulisitsisut, S. I. K., Nunaoil A/S, Nunatsinni Advokatit kiisalu Mærsk Olie og Gas A/S.

Tusarniaanermut akissuteqaatit tiguneqartut, pingaaruteqarnerannik nalilersuineq aallaavigalugu eqikkarlugit matuma kinguliani uingasumik allallugit issuarneqarput.

Aningaasaqarnermut Akileraartarnermullu Naalakkersuisoqarfik, Aalisarnermut Piniarnermullu Naalakkersuisoqarfik, Isumaginninnermut, Ilaqutariinnut, Naligiissitaanermut Inatsisinillu Atuutsitsinnermut Naalakkersuisoqarfik, Peqqissutsimut Naalakkersuisoqarfik, Namminiilivinnermut, Pinngortitamut, Avatangiisinut Nunalerinermullu Naalakkersuisoqarfik, GOIA, S. I. K. kiisalu Mærsk Olie og Gas A/S siunnersuummut oqaaseqaatissaqarsimangillat.

Aatsitassanik Suliassa qarfinnut Avatangiisinut Aqutsisoqarfiup tikkuarppaa avatangiisinut aarlerinaataasunik aqutsinissamut tunngatillugu ingerlatseqatigiiffimmi sulisut, taamatullu siulersuisut ikummatissiassanut suliassa qarfimmi ingerlatseqatigiiffimmi pisinnaatitsissummik pigisaqartumi akuusut suliassa qarfimmi teknikkikkut ilisimasaqarnersut Aqutsisoqarfiup naliliinera malillugu pingaaruteqartoq.

Nunaoil A/S ikummatissiassanut akuersissutini arlaannaanniluunniit pisinnaatitsissummik pigisaqartuunngilaq. Nunaoil A/S-ip akuersissutini piginneqataassutai ikummatissiassanut akuersissutini tamaginni 6,25 %-imiit 12,5 %-imut nikerarput. Pisinnaatitsissummik pigisaqartut teknikkikkut ilisimasaqarnissaat pillugu piumasaqaatini nalinginnaasuni allanngortitsinermik siunnersuut malitseqassanngilaq. Pisinnaatitsissummik pigisaqartut tamarmiullutik teknikkikkut ilisimasaqarnissaq pillugu piumasaqaammik naammassinnittussaanut ingerlaannassaaq. Taamaallaalli teknikkikkut ilisimasaqarnissamut piumasaqaammik malinnittussat tassaassasut Nunaoil A/S-imi siulersuisut aamma pisortaq, inatsimmi piumasaqaataajunnaarpoq.

KANUKOKA-p tusarniaanermut killiliussaq sivikitsoq eqqumiigalugu oqaatigaa, taanna KANUKOKAp isumaa malillugu sapaatit akunnerinik 5-inik killiliinissamit isumaqatigiissutigineqartumit sivikinnerujussuummat. KANUKOKA-p tassunga atatillugu oqaatigaa tusarniaaneq tusarniaanermut killiliussap sivilissusaanut nassuiaammik ilaqartinneqanngitsoq.

Aatsitassanut Ikummatissanullu Naalackersuisoqarfiup tusarniaanermut killiliussap sivikinnera ajuusaarutigaa. Nunaoil A/S-ip sapinngisamik sukkanerpaamik niuerfimmi ineriartornermut naleqqussarneqarnissaata qulakkeernissaa siunnersuummi siunertaavoq. Inatsisartuni upernaakkut ataatsimiinnermi siunnersuutip suliarineqarnissaa qulakkeerniarlugu Aatsitassanut Ikummatissanullu Naalackersuisoqarfiup tusarniaanermut piffissaliussaq sivikinnerusumik aalajangersartariaqarsimavaa. Naalackersuisoqarfiup nassuerutigaa upernaakkut ataatsimiinnissamut piffissamut killiliussat eqqarsaatigineqarnerat tusarniaanermut allakkami nassuiarneqarsimasinnaagaluartoq aammalu ersarissarneqarsimasinnaagaluartoq.

Tassunga atatillugu Aatsitassanut Ikummatissanullu Naalackersuisoqarfiup oqaatigaa siunnersuut kommunip suliassaqarfianut tunngassuteqanngitsoq, taamaattumillu KANUKOKA-p aamma Naalackersuisut akornanni Inatsisartut inatsisissaattut siunnersuutinik suliqaartarnek pillugu isumaqatigiissutaanni pineqartunut ilaanani.

Nunaoil A/S niuernerup ineriartorneranut naleqqussarneqarnissaata naapertuunna KANUKOKA-p isumaqatigalugu oqaatigaa. § 3, imm. 3 erseqqissarneqassasoq KANUKOKA-p siunnersuutigaa, taamaalilluni "attuumassuteqartumik sulianut ilisimasaqarneq" pillugu piumasagaat inatsisip oqaasertaani ilaalissalluni.

Siunnersuummi "ikummatissiassanik misissuineranut qalluinernullu" immikkuullarissumik innersuussineq atorunnaarpoq. Allannortitsinermi siunertaavoq siulersuisunut ilaasortanik toqqaanermi eqaassuseqalersitsinissaq. Taamaattoq ataatsimeersuarnermi siulersuisunut ilaasortanik toqqaanermi "attuumassuteqartumik sulianut ilisimasaqarnerup" pingaartinnissaa siunnersuummi akornuserneqanngilaq. Oqaatigineqassaaq siunnersuut aktiaatileqatigiiffinnut Namminersorlutik Oqartussanit pigineqartuni ingerlatseqatigiiffimmi aqutsilluarnissamut malittarisassanut 2012-imi decembarimeersunut naapertuummat.

KANUKOKAp oqaatigaa, aktiaatileqatigiiffinnut inatsisit nalinginnaasut allannortinneqarnissaat siunertaanngitsoq KANUKOKAp naatsorsuutigimmagu, taannami malillugu siulersuisut toqqarneqartussaammata.

Aatsitassanut Ikummatissanullu Naalackersuisoqarfiup uppersarsinnaavaa Nunaoil A/S-imi siulersuisut ingerlatseqatigiiffimmi pisortamik toqqaasussaanerisa allannortinneqarnissaa siunnersuummi siunertaanngitsoq.

Nunaoil A/S-imi ingerlataqarnerit annertussusissaattut naatsorsuutigineqartunut naapertuuttumik ataatsimeersuarnermi siulersuisut katititaanerisa naleqqussarnissaannut eqaassuseqartitsinissap siunnersuummi atuutsinneqalernissaa naleqquttoq, Kommuneqarfik Sermersooq isumaqarpoq.

Aammattaaq siulersuisunut ilaasortat ukiunut marlunut toqqarneqartarnerisa atorunnaarnera, kiisalu siulersuisunut ilaasortat amerlassusissaannut tunngatillugu ingerlatseqatigiiffinnut inatsisinut nalinginnaasunut siunnersuummi innersuussisoqarmat, neriulluarnartoq Kommuneqarfik Sermersooq isumaqarpoq.

Aatsitassanut Ikummatissanullu Naalackersuisoqarfiup Kommuneqarfik Sermersuup tusarniaanermut akissuteqaataa tusaatissatut tiguaa aammalu oqaatigalugu siulersuisunut ilaasortat amerlassusaannut tunngatillugu ingerlatseqatigiiffinnut inatsisinut nalinginnaasunut innersuussinerup malitsigisaanik ataatsimeersuarnermi siulersuisunut ilaasortat amerlisinneqarsinnaasut, assersuutigalugu niuerfimmi pisut tamanna pisariaqartilerpassuk.

Siulersuisunut ilaasortanik pisortanillu toqqaanermut tunngatillugu ammasuunissamut ersarissuutitsinissamullu tunngatillugu ingerlatseqatigiiffimmi aqutsilluarnissamut malittarisassiaasa malinneqarnissaat Naalackersuisut qulakkiissagaat, Transparency International Greenland-ip kaammattuutigaa.

Aatsitassanut Ikummatissanullu Naalackersuisoqarfiup kaammattuineq tusaatissatut tiguaa aammalu oqaatigalugu siulersuisunut ilaasortanik toqqaasarneq pillugu aalajangersagaq aktiaatileqatigiiffinnut Namminersorlutik Oqartussanit pigineqartuni ingerlatseqatigiiffimmi aqutsilluarnissamut malittarisassanut 2012-imi decembarimeersunut naapertuuttoq, erseqqissumik siunnersuummi allassimasoq.

Tusarniaanermut piffissamut killiliussap sivikinnera aammalu tusarniaanermut piffissamut killiliussap sivisussusaanut nassuiaanermik tusarniaanerup ilaqartinneqannginnera ajornartorsiutitaqartoq Transparency International Greenland isumaqarpoq.

KANUKOKAp tusarniaanermut akissuteqaataanut akissuteqaat matuma siulianiittoq innersuussutigineqarpoq.

Sulisitsisut aallaaviatigut siunnersuut tapersorsorlugu oqaatigaat. Taamaattoq Sulisitsisut siunnersuutigaat siulersuisunik aamma pisortanik toqqaanissamut piumasaqaat immikkut inatsimmi maleruagassiivigineqassanngitsoq, kisianni ingerlatseqatigiiffiup malittarisassaanniinnaq maleruagassiivigineqassasoq.

Nunaoil A/S ingerlatseqatigiiffiummat 100 %-imik Namminersorlutik Oqartussanit pigineqartoq, Namminersorlutik Oqartussat Kalaallit Nunaanni ikummatissiassarsiorluni ingerlataqarnerni soqutigisaannik isumaginnittussaq, ingerlatseqatigiiffimmi siulersuisunik pisortanillu toqqaasarnermut tunngatillugu inatsisini piumasaqaatit aalajangersimasut atuutsiinnarneqarnissaat naapertuuttoq naliiisoqarpoq. Taamaattoq Nunaoil A/S-imi siulersuisunik pisortanillu toqqaanerup maleruagassiivigineqarnerani, siusinnerusukkut pisunit annertunerusumik ingerlatseqatigiiffinnut inatsisit nalinginnaasut, aktiaatileqatigiiffiup allap suulluunniit naammassisimasussaasaasa, malinneqarnissaat siunnersuummi qulakkeerneqarpoq.

Nunaoil A/S siunertanut aalajangersakkami allannguutissatut siunnersuutigineqartumut oqaaseqaatissaqanngilaq. Nunaoil A/S siulersuisunut ilaasortat amerlassusissaannut taakkualu piffissamut toqqarneqarfissaannut tunngatillugu oqaaseqaatissaqanngilaq, kisianni ingerlatseqatigiiffimmut siulersuisuni ataavartuutitsinissap pingaaruteqarnera eqqumaffigeqqullugu.

Siulersuisut sulineranni ataavartuutitsinissap qulakkeerneqarnissaanut periarfissaq siunnersuummi ingerlateqqinneqarpoq. Naatsorsuutigineqarpoq siulersuisuni sulinerup ataavartuunissaa qulakkeerniarlugu, Naalakkersuisut maannamut pisartutut siulersuisunut ilaasortat toqqarneqaqqittarnerat atuutsissagaat.

Nunaoil A/S allappoq ikummatissiassanik misissuineq qalluinerlu pillugit siulersuisut immikkut ilisimasaqarnissaanut piunasaqaammi allanngineq Nunaoil A/S-ip tapersinngikkaa. Nunaoil A/S-ip isumaa malillugu siulersuisut pisortallu pissutsit taamaattut pillugit ilisimasaqarpata iluaqutaassasoq, kiisalu Nunaoil A/S-ip isumaa malillugu ingerlatseqatigiiffinni anginerusuni piginnaasaqarfiit assinginik piginnaasaqarnissaq aalajangiisuulluinnartoq, Nunaoil A/S-ip tassunga atatillugu innersuussutigaa. Aammattaaq Nunaoil A/S allappoq ilisimasaqarfimmi tassani siunnersortinit sullinneqarnissamik pisineq akisussasoq kiisalu ilisimasat najukkamiitinneqannginnerannik malitseqaassasoq. Tamatuma saniatigut ingerlatseqatigiiffiit allat soorlu assersuutigalugu Greenland Oil Spill Response A/S aamma Danmarkimi Nordsøfond, siulersuisut sulianut paasisimasaqarnissaannut piunasaqaateqartut Nunaoil A/S-ip innersuussutigaa.

Siulersuisunut ilaasortat aamma pisortaq ikummatissiassarsiornermut qalluinernullu immikkut ilisimasaqareerpata iluaqutaassasoq, Aatsitassanut Ikummatissanullu Naalakkersuisoqarfiup Nunaoil A/S taperserpaa. Siunnersuutip malitsigiinnarpaa tamanna inatsimmi aalajangersagaasumik piunasaqaataassanngitsoq. Atorfinnut qinnuteqartut immikkut ilisimasaqareersut toqqarneqartarnissaannut siunnersuut akornusiinngilluinnarpoq. Ilisimasanik najukkamiititsinissaq pisariaqartoq, aammalu avataaneersunit siunnersortinit sullissinissamik pisinissamit ilisimasat najukkamiitinneqartut amerlanertigut piunaneqarnerusartut pillugit Nunaoil A/S-ip oqaaseqarnera Aatsitassanut Ikummatissanullu Naalakkersuisoqarfiup taperserpaa. Tassunga atatillugu Naalakkersuisoqarfiup oqaatigissavaa najukkamiititsinissaq siunnersuummi akornuserneqanngimmat. Immikkut ilisimasaqareernissaq inatsimmi maleruagassii vigineqarunnaartoq siunnersuutip malitsigiinnarpaa. Siunnersuummi ataatsimeersuarnermi atorfinni inunnik naleqquttunik toqqaanissamut eqaannerulersitsisoqaannarpoq. Taamaalilluni ingerlatseqatigiiffinnit allanit ilisimaneqartutut siulersuisunut ilaasortat aamma pisortaq immikkut ilisimasaqareersinnaasut, siunnersuummi akornuserneqanngilaq. Tamanna siunnersuummi inatsimmi maleruagassii vigineqarunnaaginnarpoq.

Oqaatigineqassaaq siunnersuummi inatsisinut, aningaasaqarnermut inuussutissarsiornernullu tunngasut pillugit ilisimasaqassutsimut piunasaqaatit atuuttut ingerlateqqinneqamata.

Nunatsinni Advokatit allapput, Nunaoil A/S-ip piginneqataassutaannik aqutsinermi aammalu ingerlatseqatigiiffimmi aalajangiisinnaatitaanermik atuinermi, ikummatissiassanik misissuinerup

qalluinerullu iluanni immikkut ilisimasaqarnissamut piumasaqaatit atuutsiinnarneqarnissaat naleqquttutut isigineqartariaqartoq.

Nunaoil A/S-ip tusarniaanermut akissuteqaataanut akissut matuma siulianiittoq innersuussutigineqarpoq.

Siunnersuummi aalajangersakkanut ataasiakkaanut nassuiaatit

§ 1-imut

Nr. 1-imut

§ 1, imm. 1-imut

Aalajangersagaq siunertanut aalajangersagaavoq. Siunnersuutip malitsigisaanik ”Kalaallit Nunaanni avataanilu” suliassanut nunami sumiiffinnut innersuussineq siunertanut aalajangersakkami atorunnaarpoq.

Allanngortitsinermut siunertaavoq nunani allani suliassanik isumaginninneq Nunaoil A/S-imut imminermi siunertaanngitsoq, erseqqissarneqarnissaa. Siunertanut aalajangersakkamut killissaliussat iluanni suliassat suut isumagineqassanersut, aktiaatileqatigiiffimmuut qullersatut oqartussaasutut, ataatsimeersuarnermi nammineerluni aalajangerneqassaaq.

Nr. 2-imut

§ 3, imm. 1-imut

Siulersuisut inunnik tallimanik ilaasortaqaassat pillugu piumasaqaat siunnersuummi atorunnaarsinneqarpoq. Tamatumunnga taarsiullugu, aktiaatileqatigiiffinni siulersuisunik qinersisarneq pillugu ingerlatseqatigiiffinnut inatsimmut nalinginnaasumut naapertuuttumik, siulersuisuni ilaasortat amerlassusissaat ataatsimeersuarnermi aalajangersarneqarsinnaassaaq.

Allanngortitsinermi siunertaavoq aktiaatileqatigiiffinni allani ataatsimeersuarnerit assigalugit siulersuisuni ilaasortat amerlassusaasa naligiissarnissaannut ataatsimeersuarnerup pisariaqartumik kiffaanngissuseqartinnissaa. Tamanna eqaassuseqartitsinermik malitseqassaaq, taamaalilluni ataatsimeersuarnermi pisariaqartitsineq malillugu siulersuisut amerlassusaanni naligiissaarisqaarsinnaalluni, taamaattoq siulersuisuni ilaasortat minnerpaamik amerlassusissaat pillugu ingerlatseqatigiiffinnut inatsit nalinginnaasoq suli malinneqartussaalluni.

Aatsitassanut suliassaqaarfimmi niuerfimmi ineriartornerup pissusissamisoortumik malitsigisaanik piffissat ilaanni ikummatissanut suliassaqaarfimmi suliart annertussusaat nikerartussaavoq.

Ataatsimeersuarnermi aalajangiisinnataatitaanermik atuinermi qulakkeerneqassaaq, siulersuisut aamma aningaasaatinut tunngasut imminnut ataqatigiissinneqarnerat, suliart annertussusissaattut naatsorsuutigineqartunut naleqqutissasoq.

Aalajangersakkami maannakkut atuuttumi aalajangersarneqarpoq, siulersuisunut ilaasortat ukiut marlukkaarlugit qinerneqartassasut. Piffissaq ukiunik marlunnik sivisussuseqartoq taanna, Kalaallit Nunaanni Aatsitassarsiornermi aningaasaateqarfik pillugu Inatsisartut inatsisaanni § 11, imm. 2-imut assingusumik, piffissamik toqqaaviusussamik atuutsitsinissaq siunertaralugu aalajangerneqaaqarpoq.

Taamaattoq Nunaoil A/S Kalaallit Nunaanni Aatsitassarsiornermi aningaasaateqarfimmit annertuumik allaanerussuteqarpoq, ilaatigut Kalaallit Nunaanni Aatsitassarsiornermi aningaasaateqarfik aningaasaateqarfiulluni Nunaoil A/S-ip aktiaatileqatigiiffiunera pissutaalluni. Taamaattumik siulersuisunut ilaasortanut piffissamik aalajangersimasumik toqqaaviusartumik inatsimmi aalajangersagaasumik piffissaliisoqarani, Nunaoil A/S-ip aktiaatileqatigiiffinnut Namminersorlutik Oqartussanit pigineqartunut allanut naapertuuttunngortinneqarnissaa naleqqunnerusoq isumaqartoqarpoq. Assersuutigalugu Greenland Oil Spill Response A/S pillugu Inatsisartut inatsisaanni siulersuisunut ilaasortat piffissamik toqqaarneqarfigisassaannik inatsimmi aalajangigaasumik aalajangersaasoqanngilaq. Taamaattumik piffissaq toqqaaviusartoq ukiunik marlunnik sivisussuseqartoq maannamut atuuttoq, Inatsisartut inatsisaanni atorunnaarsinneqarpoq.

Maannamut pisartutut naatsorsuutigineqartariaqarpoq siulersuisuni ilaasortat tamarmik imaluunniit ilaasa qinerneqaaqqinnissaat Naalakkersuisut ammaffigissagaat. Taamaaliornikkut siulersuisut suliaqarneranni ingerlaavartitsinissaq qulakkeerneqassaaq.

Allanngortitsinermi naalagaaffiup siulersuisuni ilaasortamik inummik ataatsimik toqqaanissamut periarfissaqarnera allanngortinneqanngilaq.

Nr. 2-imut

§ 3, imm. 2-imut

Siunnersuutip malitsigisaanik § 3, imm. 2-imi teknikkikkut allannguutit marluupput.

Ilaatigut ”Namminersorlutik oqartussanut” allanngortinneqarpoq ”Namminersorlutik Oqartussanut”. Tassani oqaatsitigut allannguineq pineqarpoq. Tamatumunnga atatillugu najoqqutassani allanngortitsinissaq eqqarsaatigineqanngilaq.

Ilaatigut aalajangersakkami uniffiup aappaa atorunnaarsinneqarpoq. Allannguut taanna sunniutaasutut iluarsiieneruvoq. Sunniutaasutut iluarsiiineq § 3, imm. 1-mut allannguutissatut siunnersuutigineqartumut ataqatigiissillugu isigineqassaaq, taanna malillugu maannamut inuit 5-iunissaat pillugu maleruagassat atorunnaarluni, takukkit § 3, imm. 1-imut siunnersuutigineqartumut nassuiaatit.

Allanngortitsinermi naalagaaffiup siulersuisuni ilaasortamik inummik ataatsimik toqqaanissamut periarfissaqarnera allanngortinneqanngilaq.

Nr. 2-imut

§ 3, imm. 3-imut

Allannguutaasup malitsigisaanik siulersuisut inatsisinut, aningaasaqarnermut inuussutissarsiornermullu tunngasut pillugit ilisimasaasa annertussusaannut piunasaqaat ingerlateqqinneqarpoq, taamaattoq ikummatissiassanik misissuinermit qalluinerimullu tunngatillugu ilisimasanut innersuussineq peerneqarluni.

Allanngortitsinermit siunertaavoq siulersuisunut ilaasortanik toqqaanermi eqaassuseqartitsinissaq, taamaalilluni siulersuisut aamma tassaasinnaallutik inuit ikummatissiassanut tunngasut pillugit immikkuullarissunik ilisimasaqareersimasinnaasut, kisianni suli pissutsit allat ikummatissiassanut tunngasunit allaanerusut pillugit sulianut qaffasissumik ilisimasanik uppersarnerqartunik ataatsimoortumik pigisaqartut.

Aalajangersagaq aktiaatileqatigiiffinni Namminersorlutik Oqartussanit pigineqartuni ingerlatseqatigiiffimmi aqutsilluarnissamut malittarisassanut december 2012-imeersunut, naammassinnippoq.

§ 2-imut

§ 2, imm. 1-imut

Aalajangersagaq piffissamut siunnersuutip atuutilerfissaanut tunngassuteqarpoq.

Siunnersuutigineqarpoq siunnersuut ulloq 1. juli 2017 atuutilissasoq.